

Otmar Oduber a presenta Marisol Lopez-Tromp como candidato di Partido POR



ORANJESTAD AAN: Sr. Otmar Oduber di Partido Por a anuncia un momento hopi special pa plataforma E Forza Nobo, mirando riba e forza cu e partido ta creando y cosechando den comunidad, y trece dilanti un momento hopi special cu ta trata di anuncio di un colega nobo cu a uni na e plataforma aki y cu naturalmente ta duna mas contenido na e nomber y apodo cu nan a haya den comunidad 'E Forza Nobo'.

Manera ta conoci desde aña pasa cu sr. Oduber a distancia y despues tuma su retiro como Minister, y despues di combersacionnan hopi habri cu su famia, amigo y comunidad di Aruba, el a tuma decision di sigui su carera politico cu comunidad na pecho y cuminsa un politica diferente, un politica basa riba un forza nobo cu mester contene experiencia di esnan cu conoce e materia combina cu caranan fresco, nobo, cu ideanan nobo pa forma un equipo y un plataforma cu lo kibra e 'rutina' di practicamente ultimo 40 aña di dos partido, uno berde uno geel, cu cada biaha ta den contienda pa pone nan signatura den un gobierno.

Sr. Oduber ta conta cu tabatin un acercamento mutuo entre e y Parlamentario Andin Bikker for di cuminsamento di aña pasa, sinembargo ora ta carga responsabilidad, mester tin mas consistencia cu ta posibel. Pero mirando cu ja no tabatin confianza y no tin sosten mas pa gobierno, nan a dicidi di forma e plataforma y uni nan conocimiento, nan forza bao di hala di partido nobo, pa un pueblo orguyoso y respeta, caminda nan a cuminsa acerca

un oportunidad pa bay dilanti den su bida, cu su famia, den su hogar, y pa por tin un mihor bida y futuro na Aruba.

E proceso a sigui cana y a yega te na combersacionnan cu Marisol, kende sr. Otmar Oduber ta describi como un persona cu ta para pa su principio, cu su base y su dignidad ta asina importante p'e, cu na cierto momento el a bandona un partido cu el a cuminsa su carera politico y a base di mesun principio a dicidi di bandona sosten di gobierno actual pa medio di su voto den Parlamento, y pa motibo di mesun principio aki, el a vota manera un Parlamentario di berdad mester vota, sin influencia, sin imposicion di e partido, bon of malo, el a vota segun su consenshi y pa representa bo comunidad di e mihor manera cu ta posibel. Despues di varios combersacion cu Marisol, entre Andin y Marisol, Otmar y Marisol y entre nan tres, y cu mas persona presente, combersacionnan hopi habri



y transparente, pa motibo di ta trata di tres politico activo cu ta nifica practicamente 9 mil voto den ultimo eleccion, entre Marisol y Otmar ta trata di casi 6 mil voto cu a sostene Gobierno actual, kiermen riba 3 asiento, sin inclui nan coleganan cu a uni den plataforma y a pone nan carera un banda y ta kere den un plataforma cu ta propaganda un politica diferente y cu comunidad di Aruba tin siguranza, cu asina temporada di campaña cuminsa, cu e forma di hiba politica lo ta uno totalmente diferente.

Y basa riba combersacionnan aki, na unda nan a mira cu tin un meta comun, cu amor pa e pais, cu experiencia, cu forza di hobennan, cu experiencia di esnan den sector priva, nan ta combenci cu despues di September benidero, Aruba lo conoce despues di 40 aña, un forza nobo, un di tres forza cu lo percúra pa gobernacion y representacion den Parlamento di Aruba, cambia di rumbo y bay na un caminda mas positivo, mas progresista y un rumbo cu por trece mas felicidad pa comunidad di Aruba.